

08/04/2024

Aizawl

1830 Hrs

## REGIONAL NEWS

### HEADLINES:-

1. Lok Sabha inthlanpui neih mekah vawiin khan Dist thenkhatah Home Voting kalpui tan a ni.
2. Chief Electoral Officer Pu Madhup Vyas-an Lok Sabha inthlanpui neih mek dinhmun thlirin vawiin khan Kolasib a tlawh .
3. Lok Sabha inthlan campaign ngawrh takin ramchhung hmun hrang hrangah neih mek a ni.
4. Congress party chuan rorellai BJP sawr chu sakhuana hmanga ram thendarhah an puh

<><><>

### HOME VOTING IN PROGRESS

Lok Sabha inthlanpui neih mekah Aizawl District chhunga Assembly bial thenhran 12 ah pawn chhuak theilo te tan ina vote an thlak theihna tur ruahman sak an ni a,

Election Commission of India (ECI) ruahman angin kum 85 chin chunglam leh rualbanlote, vote thlak tura polling station pan tura harsatna neite tan mahni in lum atanga vote an thlak theih na tur Home Voting hi kalpui a ni.

Aizawl District ah hian home voting ti turin mi 874 chhinchhiah an ni a, an zinga 54 chu rualbanlo an ni. Hemi atan hian election duty mi engemawzat chu team 22 an inthenin Assembly segment hrang hrangah an kal a, Postal Ballot hmangin vote hi thlaktir an ni.

Lawngtlai District ah pawh assembly bial pathumah vawiin atang khan inlama vote thlak ngai, absentee voter-te'n postal ballot hmangin vote an thlak tan a.

In lama vote thlak tur te vote thlaktir turin Tuichawng leh Lawngtlai West bialah mobile polling team pakhat ve ve leh Lawngtlai East bialah mobile polling team pahnih siam a ni a. He'ng mobile polling team-te hian vawiin atang khan Lawngtlai District chhunga kum upa leh vohbik mahni in lama vote thlak turte chu an inah kal chilhin postal ballot hmangin vote an thlaktir a. Home voting hi tun thla ni 13 thlenga kalpui tura ruahman a ni.

Tuichawng bialah home voting dil 23, Lawngtlai West bialah 22 leh Lawngtlai East bialah home voting dil 99 an awm a. Lawngtlai District-ah a pum puiah home voting dil 144, kum upa 140 leh rualbanlo 4 an awm a.

He'ng bakah hian Lawngtlai District atangin essential service atanga postal ballot-a vote thlak dil 26 awm bawkin, an zinga mi pasarih chu Lawngtlai District chhunga vote nei an ni a. Vawiin atang khan an ni tan hian vote thlak theih hun hawn tan a ni a, ni 10 thleng hun hawn niin, chawhma dar 10 leh chhun dar 12 inkarah vote thlak theih a ni.

Siaha district huam chhunga 'Essential Service Voter' te chuan Voter Facilitation Centre, DC. Office- ah postal ballot hmangin vawiin khan vote an thlak tan a, Pu V.L. Hruaizela Khiangte, District Election Officer chuan 'Voter Facilitation Centre' hawngin vote thlak hi tan nghal a ni.

Kan corr tarlan danin, Sawrkar Department pathum- Prison, Medical leh Power & Electricity atangin Voter- 14 ten vote hi an thlak a, vawiin vek hian vote thlak zawhfel beisei a ni.

Saitual District-ah vawiin atang khan Home Voting tan a ni a, hemi atan hian Polling Party te chu an kalna hlat dan azirin tukin zing dar 5 atang khan DC Office tual atangin an chhuak a, vawiin vek hian an let leh ang. Home Voting hmanga vote thlak tur hi Saitual District huam chung Assembly bial pathum Chalfilh, Tawi leh Lengteng-ah mi 194 chhinchhiah niin hriat theih chinah vote thlak upa ber chu kum 100 mi, Zadenga NE Khawdungsei II a mi a ni.

Mamit ah pawh Home Voting tan turin inbuatsaih a ni a, Vawiin khan Mamit DC Office-ah Training buatsaih a ni a.

Election Officer Pu Lalsanglura chuan home voting turah mawhphurna neite chu uluk taka Training tur leh an mawhphurhna tha taka hlenchhuak turin a chah a. Mamit District chung Constituency 3-a khaw 34-ah PwD 30 leh kum upa 82, an vaiin 112 in lama vote thlak tur hi an awm a ni.

Home Voting Team hi 11 awm in member 2, Poll Officer leh Micro Observer an awm a, naktuk zing dar 7 atangin Home Voting Team te hi an feh chhuak tan ang.

<><><>

#### KOLASIB LAND OWNERS ASSN

Kolasib District Land Owner Association chuan Vairengte leh Sairang inkar kawngpui 4 lane laih tur, kum 3 hma lama tan tawh tun thlenga kalpui la ni si lo chu chinfel thuai ni se an ti.

Vawiin khan hemi chungchang hi Aizawla Prss Club-ah thuthar thehdarhtute hrihlin tun thla ni 15 hmaa chinfel sak an nih loh chuan Lok Sabha inthlanpui vote thlak chu an member leh an chungten boycott an tum thu a sawi.

Kolasib District Land Owner Association Ex Chairman Pu James Vanlalringa chuan kawnglaihin an ram a tihchhiat tur hi chungkaw 1700 chuan nih thu sawiin, kawng laih tura hmalakna avang hian an eizawna ram leh lo chu tihtawp sak an ni a, amaherawhchu hmalakna a awm chuan si loh avang leh an ram laksak an nih avanga zangnadawmna an hmuh loh avangin nasa takin an tuar tih a sawi a ni.

<><><>

#### CEO VISIT KOLASIB

Chief Electoral Officer Pu Madhup Vyas-an Lok Sabha inthlanpui neih mek dinhmun thlirin vawiin khan Kolasib a tlawh a, Kolasib DC Conference Hall-ah Kolasib district-a inbuatsaihna hrang hrang kalpui dan endikin Election kaihnhawih a Nodal Officer leh Sector Magistrate-te a thutkhawmpui.

CEO chuan mipui aiawh thlan chhuahna tura vote thlak ngaih pawimawh kawng ah State dangte entawntlak khawp a 'Model State' ni tur a tan lak a pawimawh thu sawiin state Assembly inthlanna nen a khaikhin chuan Lok Sabha inthlanna ah vote a tlak tlem hle thin thu a sawi a. Mipuite aiawha rorelna sanga ding tur thlan chhuahna a vote thlak thei nih a hlut zia inzirtir a tul thu sawiin vote thlak zat dik tak hriat theih nan Electoral Roll uluk tak a ennawn leh vawn that a ngaih thu a sawi bawka ni.

He huna tarlan anih danin, Kolasib Dist ah hian Vote nei mi 63819 an awm thu te, chung zing a mi 2853 chu vote nei thar, kum 18 leh 19 inkar an nih thu a sawi a. Vote thlakna tur Polling Station 89 zing a 11 chu hmeichhe enkawl,' Women managed Polling Station' a ni anga, Polling Station za zel a 60 chu internet nen a thlunzawm a Web Casting hmanga a vil theih tur a ruahman a nih thu a sawi.

He thutkhawm hi Deputy Commissioner Pu John LT Sangan kaihruiin SP Pu David H Thangliana chuan inthlanna kalpui chung a dan leh thupek kenkawh a

nih theih nana inbuatsaih dan a sawi a. Inthlan hun a Election official-te leh vote thlak tur te tan Polling Station-ah inthiarna, tui intur thianghlim leh kawlphehtha thlunzawm a nih dan te tarlan niin mipui hnen ah ruah tui khawl pawimawh zia pho lang thei tur 'Unique Polling Station' buatsaih a nih thu tarlan a ni bawk.

<><><>

### LADC MNF

Lai Autonomous District Council (LADC) a MNF Legislature Party chhunga thuneihna inchuhna kalzel ah, vawiin khan MN, MDC pasarih ten MNF Party atanga banna an thehlut.

MNF MDC pasarih bangte hi Pu Manghmunga Chinzah, Pu T.Lalengmuana, Pu V.Zathanga, Pu BN Thangpuia, Pu Tutura Singh, Pu L.Lalmachhuana leh Pu CL Lianzuala ten an ni a, vawiin khan MNF District Hqrs Lawngtlai President hnen ah banna hi an thehlut a ni.

Puan tawh thin angin LADC a MNF Legislature Party chhungkaw buaina vangin MNF Legislature Party a MNF, MDC te leh BJP, INC, ZPM leh Independent Member an vaiin MDC 13 ten Chief Executive Member(CEM) chuan thlawptu a ngah tawklo tih Governor ah an thlen hnu ah CEM Pu V.Zirsanga chuan floor test neih hmain CEM atangin banna a thehlut a. Hetihlai hian MDC 13 intelkhawm zinga pakhat chu lehlamah pakaiin, Elected Member 24 awm mekna LADC ah tumah Sorkarna siamthei awmlovin Member 12 ve ve an awm tak vangin Governor chuan LADC thuneihna laksakin thlaruk chung atan LADC enkawl lailawk turin Lawngtlai DC chu dah a.

LADC ah hian Elected Member 25 awmin Assembly inthlanpui neihah khan Chandmary bialtu MDC Dr.Lorrain Lalpekliana Chinzah chu Lawngtlai East bial ah MLA atan thlantlin a ni a, Dr.Lorraina hian MDC a nihna a bansan tawh avangin tun dinhmunah LADC ah hian Elected Member 24 an awm mek.

<><><>

### HACKVENTURE 2.0

Mizoram Police leh NIT Mizoram-te tawngkawpiin a an buatsaih, ni thum awh tur, National Level Hackathon event – "Hackventure 2.0" chu vawiin khan Mizoram DGP, Pu Anil Shukla-an Arya Mess, PHQ-ah a hawng.

He hunah hian Pu Anil Shukla chuan Hackathon event hi Mizoram police-te leh mipui inkara inkungkaihna tha zawk siamna tur atan mai bakah tunlai thiamna thar ber hmanga kawng hrang hrang a police hna pui theihna tur atana thalai ho thiamna, finna leh hriatna sawr chhuah a hman chhuah theihna tura buatsaih anih thu a sawi a. Police hnaah chuan data kaihnawih thil a tam avangin database mumal leh tha zawk neih nan leh suauna tam zawk pumpelh anih theih nan he hun buatsaih kaltlang hian technology chu tangkai zawka hman dan duan chhuah anih theih ngei a beisei thu sawiin NIT, Mizoram nena thawhona tha tak an nei thei chu lawmawm a tih thu a sawi bawk a ni.

"Hackventure 2.0" hi Mizoram Police leh NIT Mizoram-te tawngkawpin an buatsaih Hackathon vawi hnihna niin he event-a tel tura sawmna hi India ram NIT zawng zawng mai bakah Mizorama engineering institution hrang hrang hnenah thawh chhuah a ni a. An tum ber chu IT product, Mizoram Police-in an mamawh tur duan chhuah niin he contest hian Police tana tangkai tur, IT lama ruahmanna mai bakah idea hrang hrang tuai hnum a hman tak tak theih tur chher chhuah a tum a ni.

<><><>

## NE NSS FESTIVAL

Northeast NSS Festival chu Ministry of Youth Affairs & Sports leh State Sorkar tangkawpin kar kalta chung khan a buatsaih a. He festival hi Northeast State te in unauna tha zawk leh tanrualna atana buatsaih thin a ni.

Kumin hian NSS Cell, Mizoram in he festival hi Art & Culture Centre, Beraw tlangah a thleng a ni. NSS Volunteers 280, 16 Programme Officers leh 16 Official te he festivalah hian an tel a ni.

Festival chung hian activity hrang hrang - Cultural Programme, Academic Session, Morning Exercise/Walkathon, Trekking, Slogan writing leh thil dang dang te neih pui an ni.

Zan lamah Cultural Programme hman thin a ni a, State hrang hrang ten an hnam zia rang pho lanna hun an nei thin bawk.

<><><>

## ELECTIONEERING

Lok Sabha inthlan campaign ngawrh takin ramchung hmun hrang hrangah neih mek a ni. Prime Minister Narendra Modia chuan vawiin khan Chhatisgarh-a Bastar district-ah BJP Lok Sabha inthlan campaign a hawng a. Aamabal khuaa Vijay Sankalp Shanknaad kawngzawhah thu a sawi a ni. Bastar Lok Sabha constituency hi April ni 19 ah an inthlang dawn a ni. Vawiin vek khan Prime Minister Narendra Modia hian Maharashtra-a Chandrapur a tlawh bawk a. Chandrapur leh Gadchiroli Lok Sabha bial ah BJP tan a candidate a ni.

Congress hruaitu senior Rahul Gandhi pawhin vawiin khan Madhya Pradesh-a Seoni leh Shahdol ah te campaign a tan a.

BJP hruaitu AMit Shaha'n naktuk hian Assam-a Dibrugarh, Lakimpur leh Sonitpurte a tlawh dawn bawk a ni.

<><><>

## CONGRESS

Congress party chuan rorellai BJP sawr chu sakhuana hmanga ram thendarhah an puh. New Delhi-a chanchinbumite a kawmnaah Congress thupuangtu Supriya Srinate chuan he thu hi sawiin BJP chuan tun tum Lok Sabha inthlan turah pawh hian kum 10 chungah an hnathawh tarlang ngam lovin ramchungah sakhaw hrang hrang te inkarah khi an siam tih a sawi.

<><><>

## K KAVIHTA BAIL DENIED

Delhi High Court chuan BRS hruaitu K Kavitha-i bail dilna a hnawlsak. K Kavitha hi liquor policy scam ah sum chhehrelh thubuaiah Enforcement Directorate ten an man a. Special CBI judge Kaveri Baweja chuan interim bail dilna hi a ngaihtuah hnuah a hnawl sak a ni.

Kavitha hi naktuk April ni 9 thleng judicial custody in a awm dawn a. March ni 15 khan ED chuan Hyderabad-a a chenna inah an man a, Tihar Jail ah a awm mek a ni.

<><><>